

四庫全書

集部

欽定四庫全書

集部  
元藝圃集卷二

詳校官中書臣陸湘

侍讀臣孫球覆勘

總校官檢討臣何思鈞

校對官編修臣盧燧

謄錄監生臣李世麟

欽定四庫全書

元藝圃集卷二

明 李昶 編

趙孟頫

溪上

溪上春風吹柳花  
溪頭春水淨無沙  
白鷗自信無機事  
玄鳥猶知有歲華  
錦纜牙樯非昨夢  
鳳笙龍管是誰家  
令人苦憶東陵子  
擬向田園學種瓜

過岳王墓

岳王墳上草離離  
秋日荒涼石獸危  
南渡君臣輕社稷  
中原父老望旌旗  
英雄已死嗟何及  
天下中分遂不支  
莫向西湖歌此曲  
水光山色不勝悲

和子敬秋懷

吳宮烟冷水空流  
慘淡風雲萬里秋  
禾黍故基曾駐輦  
芙蓉高閣迥添愁  
綉楹錦柱蛟龍泣  
金沓瑤階鹿豕遊  
宋玉平生最蕭瑟  
欲將九辨賦離憂

絕句

春寒惻惻掩重門  
金鴨香殘火尚溫  
燕子不來花又落  
一庭風雨自黃昏

梅花開盡雪飄零  
楊柳青青春水生  
一夜東風吹鴈過  
江南江北故鄉情

見章得一詩因次其韻

水色清漣日色黃  
梨花淡白柳花香  
即看時節催人事  
更覺春愁惱客腸  
無酒難供陶令飲  
從人皆笑酈生狂

城南風暖遊人少自在晴絲百尺長

奉和帥初雨中見贈

正坐清談與世違交情如子定應稀圖書跌宕心猶在  
裴馬清狂意已非黃鶴未知何日返飢烏故作傍人飛  
谿南流水清如玉終擬歸休理釣磯

東陽八詠樓

山城秋色淨朝暉極目登臨未擬歸羽士曾聞遼鶴語  
征人又見塞鴻飛西流二水玻璃合南去千峰紫翠圍

如此山中良不惡休文何事不勝衣

蛾眉亭

天門日湧大江來牛渚風生萬壑哀青眼故人携酒共  
兩眉今日為君開蒼岷直下蛟龍吼白浪橫空鵝鶴迴  
南眺青山懷李白沙頭官渡自相催

時與劉伯宣  
尚書同登

酌突泉

灤水發源天下無平地湧出白玉壺谷虛久恐元氣泄  
歲旱不愁東海枯雲霧潤蒸華不注波濤聲震大明湖

金定世集  
卷二  
時來泉上濯塵土冰雪滿懷清興孤

題范蠡五湖杜陵浣花

春色醺人苦不禁蹇驢馱醉晚駸駸江花江草詩千首  
老盡平生用世心

題孫登長嘯圖

在澗幽人樂考槃南山白石夜漫漫空林無風萬籟寂  
長嘯一聲山月寒

題羣仙壁



羣仙來會藥珠宮  
花滿瓊山翠滿空  
環珮珊珊五雲際  
半天鸞鶴舞春風

題王子慶所藏大年墨鴈

鴻鴈栖栖遵渚黃  
蘆索索鳴秋羨  
敘承平公子筆端萬  
里滄洲

馬祖常

擬古

崇臺拂繁雲阿閣蔭廣路  
上有彈琴女文彩被烟霧  
玉

食薦翠盤渴飲瓊草露鄙薄貧士妻終歲弄機杼

春雲

高雲起城闕流離度庭樹依風拂迴塘波瀾光彩注荒  
林帶疎烟照日亂縈縷婉孌連浮陽空明映淒霧嵐翠  
含玉暉景采滿嵩嶼逍遙幽賞諧緬邈世娛阻

雜詩

四時更代謝物化常隨之春華曾幾何歲月忽如茲嚴  
風動高林百草俱已萎人生况有役憂患乃其宜棄捐

勿復念出入由化機安得松喬術邈與世相違

題李伯時元祐內廐五馬圖黃太史書其齒毛

五馬何翩翩瀟灑秋風前君王不好武芻粟飽豐年朝  
入閭闔門莫秣十二閑雄姿耀朝日滅沒走飛烟顧盼  
增意氣羣龍戲芝田駿骨不得朽託茲書畫傳誇哉昭  
陵石歲久當頽然

慶壽僧舍即事

白雨映青松蕭颯洒朱閣稍覺暑氣消微涼度疎箔客

居秋寺古心跡俱寂寞夕蟲鳴階砌孤螢炯叢薄展轉  
懷故鄉時聞風鳴鐸

題先天觀

對此山水詠使人塵慮銷况茲構真館燕坐遠煩囂青  
林蔭戶牖素雲冠山椒松風和澗泉雜佩響瓊瑤焚香  
玉女降長齋百靈朝仙道本不遠清都亦非遙自嗟衰  
莫年頗費猿鶴招安得生羽翰從子以消搖

偶記舊詩一首在德清別業時作

春情浩無端野興欣有矚山光艷桃李澗影瀉松竹古  
來巖穴士白駒在空谷幽鳥何處來啼破林烟綠

贈恢上人

晨坐古松下有僧來叩扉松花落金粉細細點春衣折  
松當塵尾相對澹忘機湯休不可作政索解人稀

贈相士

我昔放浪江湖間舉頭開眼看青山安知世故不相舍  
坐受塵土凋朱顏髭鬚已黃行且白亦知人生不滿百

功名富貴非我事但願有酒呼好客錢塘江邊逢少年  
兩眼善相口談天封侯食肉骨法異慎勿置我諸公前  
江南春暖水生烟何日投閒茗水邊買經相牛亦不惡  
還與老農治廢田

贈相者

吾聞伯樂善相馬一顧千金長高價何人個儻買權奇  
滿眼駑駘居樞下張君年少目有神走半江湖多閱人  
我生瘦悞乏駿骨浪許騰驤防未真連朝春雨今始晴

花枝照眼生春情樓前山色橫翠靄湖上柳黃飛亂鴛  
便須沽酒與君飲醉倒花前且高枕懶從唐舉問流年  
欲向德翁謀小隱

題額森特穆爾開府宅壁畫山水歌

大山率律摩青天小山平遠通雲烟商侯胸中有邱壑  
信手落筆分清妍閨風玄圃元不遠粲爛金碧流潺湲  
參差澗谷樓觀起縈紆石路朱橋連松風颼颼響虛閣  
棋聲剝啄來羣仙漁歌樵唱渺何許綸巾羽扇清溪邊

高情自有泉石趣涼意不受塵埃纏世間書畫亦豈少  
誰能真賞如公賢華堂風日不到處絕勝綉幙空高懸  
舉觴酌酒為公壽眼明對此三千年

題商德符學士桃源春曉

宿雲初散青山濕落紅繽紛溪水急桃花園裏得春多  
洞口春烟搖綠蘿綠蘿搖烟掛絕壁飛流淙下三千尺  
瑤草離離滿澗阿長松落落凌空碧雞鳴犬吠自成村  
居人至老不相識瀛洲仙客知仙路點染丹青寄輕素



何處有山如此圖移家欲向山中住

贈張彥古

秋雨新已風日清忽聞剝啄敲門聲出逢麻衣老僊伯  
身長七尺雙瞳明平生學道幾半世一見灑灑心為傾  
大道無為返爾朴自然有路通長生我今素髮颯以白  
宦途久矣思歸耕吳興山水况清絕白雲滿領堪怡情  
老仙何當從我去小築茅屋依崢嶸還丹已就蓬島近  
笑指塵海尋方平

燕脂驄圖歌

騏驎騷裏世常有伯樂不生淹棧豆歛見此圖神自王  
權竒磊落龍為友隅目晶瑩生紫光錦毛錯落蒙清霜  
霜蹄蹙踏寒玉響霧鬣振動秋風涼朝浴扶桑騰浩蕩  
莫秣崑崙超象罔雄姿似隘六合小盛氣欲繭浮雲上  
嗅塵一歎驚肉飛奮迅不受人間鞿豈惟萬馬羞欲死  
直與八駿爭先馳只今相者多舉肥歎息此圖誰復知  
君不見王處仲半生隱德真成癡

偶成

竹林深處小亭開  
白鶴徐行啄紫苔  
羽扇不搖紗帽側  
晚涼青鳥忽飛來

浮玉山

玉湖流水清且閒  
中有浮玉之名山  
千帆過盡莫天碧  
惟見白雲時往還

金山

江水西來接太空  
中流突兀湧鼇宮  
妙高臺上一迴首

看盡世途風浪中

和黃景杜雪中即事

君說江南苦未歸  
香橙新酒蟹螯肥  
何當與子扁舟去  
共挽清溪浣客衣

當年臨水照春衫  
浮玉山前水似藍  
歸計未成羈思惡  
為君飛夢到城南

幽獨

獨坐不自聊  
披草尋微逕  
夕陽在高林  
籬落有餘映  
依依

依增遠想歷歷生晚聽涼蟬軋鳴箏候蟲擊清磬大小  
皆有從雄雌各相應沉吟復躊躇忽覺西山暝

松澗詩贈丁師善

青松上參天下有幽澗泉高人居其間萬慮不至前讀  
書得妙趣視世等浮烟胡為舍此去杖策走日邊要當  
陳忠益民瘼會有痊却歸弄泉石靜聽松風眠

兵部廳事前枯栢

庭前枯栢生意盡枝葉乾禽擲木病黃風白日吹沙塵

鼓動哀音亂人聽嗟哉爾有歲寒姿受命於地獨以正  
雨露雖濡心自苦鳳鳥不來誰與盛豈無松檟在山阿  
只有蓬蒿没人脛我生愧乏梁棟材浪逐時賢繆從政  
清晨騎馬到官舍長日苦飢食還併簿書幸簡不得休  
坐對枯槎引狐興人生何為貴適意樹木託根徬先性  
幾時歸去卧雲林萬壑松風韻笙磬

初至都下即事

盡日車塵馬足間偶來臨水照愁顏故鄉兄弟應相憶

同看溪南柳外山

登都北神山醉中題壁

過溪踏瑤瓊入山採蒼翠仙宮名神山下負六鰲背  
我來訪丹藥羽人已千歲清嘯響山谷幽姿媚松檜  
白水從北來南與衆川會開窓目沃野千峰儼相對  
自是山林樂何但官爵貴買田釀清泉里社日相慰  
詩成悵如失天風逼衣袂東望鄒衍廟盃酒可遠酌  
談天劇當時古屋尚粉繪騎驢獨歸去人世空一喟

息齋風竹圖道士華山隱得之命予賦之

往年家住篔簹谷丹鸞之實美如粟玄雲翻空下深  
靚昆吾寶劍削秋玉石衣清錦侵書光風微粉墮生  
細香琳館瑤臺九天近夜寒笙磬聲鏘鏘萬斛蒼烟  
鬱江雨二妃彈瑟瀟湘浦郢笳蜀酒亦堪沾蟠石雙  
杖令誰取河朔歲晏冰為梁羣木鱗皴臨雪霜遲汝  
狂飈莫吹裂截管他年侑帝觴

李夫人



未央天子香醺骨美人不貯黃金屋水銅無光溢秋  
月留得當年舊蛾綠瑤臺夜佩聲闌珊沉雲叫鴈沙  
泉寒二十五弦彈鳳凰玉釵小燕飛春山

祝丹陽祠武當

東窺禹穴西龍門狎虎豹兮觀魚龍中有武當神所  
宮捫摩光景憑雲風旁礴頰入厚地裂環視百鎮真  
叢叢延祐天子聖明主萬歲千秋作風雨

蔡州妓趙氏墜崖以死自誓作詩諷俗

鱗鱗汝水冰碧光汝之左右百草芳紅蘭紫桂媚長晝  
鉤輶鳥子回銀塘芟蒲無數菱葉小西家鞦韆屬年少  
燕泥霽雨風景酣簾幙依稀看歌笑趙氏女子邯鄲娼  
綵絲繡履踏春陽心思宛轉縈雲縷羞對兒郎唱鳳凰  
樂山嵯峨石生雨鄉人迎神奏歌舞娑娑起向神祠前  
祝願生身事針組野風吹目雙淚零泉聲松韻相泠泠  
諸言女子親愛癖誓死命輕如鳥翎鳥翎飛上合歡樹  
開花夜夜無愁苦秋香不斷相思浦玉釵斷股埋黃土

題簡天碧畫山水

西江隱君簡天碧醉來畫水復畫石春山秋樹綠更紅  
木橋野屋橫且直烟雲翳鬱風雨交元氣淋漓障猶濕  
雪篷夜宿魚尾舫晴蓑曉掛牛角帙岷關巫峽冬氣清  
猿啼鳥嘯天一尺老來看畫眼苦澁便擬買田溪水側  
脫去賜帶繫芒履著書五車刻苔壁

春行南郊

綠樹連城合蒼藤入澗懸作橋分野路取竹縛溪船載

酒誰留客看花我欲顛歌詩諧故老笑語屬神仙自鑿  
蒲萄井人開苜蓿田啣櫻黃鳥弄窺藻白鷗翮狎坐欣  
時俊隨行喜少年山陰知寂寞春服且雲烟

劉辰翁

春晴

江柳長天草色齊新晴何物不芳菲無因化作千蝴蝶  
西蜀東吳欸欸歸

新燕池塘綠雨肥初晴未暖日光微角中猶帶花梢濕

纔倚闌干見絮飛

鮮于樞

湖上曲

湖邊蕩槳誰家女  
綠慘紅愁問無語  
低回忍淚並人船  
貪得纏頭強歌舞  
玉壺美酒不消憂  
魚腹熊蟠棄如土  
陽臺夢短匆匆去  
鴛鎖生寒愁日暮  
安得義士擲千金  
坐令桑濮歌行路

楊真

錄汴梁宮人語

一入深宮裏經今十五年長因批帖子呼到御床前  
殿前輪直罷偷去賭金釵怕見黃昏月殷勤上玉階  
人間多棗栗不到九重天長被黃衫吏花攤月賜錢  
邊奏行臺急東華夜啟封內人催步輦不候景陽鐘  
駕前雙白鶴日日候朝回自送鑿輿去經年更不來  
陡覺文書靜相將立夕陽傷心寧福位無復夜薰香  
別殿弓刀響倉黃接鄭王尚愁宮正怒含淚強添粧

一向傳宣喚誰知不復還來時舊針線記得在窗間

晚至青口

長年困行役短髮易飄零世事驚春夢交親散曉星燒  
痕侵路黑柳色夾堤青落日明霞底原情動鶴鴿

得邳大用書復寄

百年真夢寐萬國久風塵老去偏相憶書來恨不頻季  
鷹猶在洛王桀未歸秦谷口知何似他時願卜隣

次答伯直侍郎

家貧餘四壁地勝接三鄉才賦狂司馬形容老遂良畫  
眉從爾閣舞袖為誰長生死交情在書紳示不忘

有懷梁仲經父

美人熒熒在何處海濶天低隔烟霧珊瑚零落芙蓉空  
咫尺相望迷遠路翠輦金輿雙鳳凰風吹環珮聲琅琅  
壺觴狼藉事已往一日萬里愁茫茫劉郎竟是誰家客  
歲晚霜華林葉赤美人熒熒在何處鳴綠江頭江月白

浮生懷裕之



漢節飛雲外秦城落照邊  
浮生空自老歸計定何年  
淚滿陳蕃榻心遙祖逖鞭  
短詩聊遣興羞向故人傳

吳訥

李將軍歌

太倉積粟皆紅腐羣猫晝眠鼠  
變虎前鋒不見李將軍  
何人為發千鈞弩去年我從昱嶺來  
匹馬馳突三關閉  
北平未入衛青幙郭隗獨上燕昭臺  
近聞西府羅俊彥  
人人自謂能酣戰誰似當年背水軍  
赤幟纔臨趙城變

英雄報國如等閒  
馬革裹屍銅柱間  
明朝按劍收中山  
謗書慎勿回天顏

鐵崖仙人歌為揚廉夫先生作

鐵崖山中鐵笛仙  
落花滿身花底眠  
兩龍携來東西語  
蟠桃一醉三千年  
偷桃更有東方子  
拍手一笑天門裏  
眼中九點齊州烟  
案上小兒不如蟻  
歸來跳入壺中天  
鐵仙亦在蓬萊巔  
回首樓船問瑤草  
水弱雲深秋月老

先生有雙鐵笛名之曰  
大鐵龍君小鐵龍君

汪莊

寄友

覺來一悵望幽興知有期炊烟出深竹暮雨鳴清池  
翩歸林翩澹澹遙山姿行吟偶成詠奉以寄所思未足  
道平素聊慰別經時

休寧縣斷崖

青山欲盡兩崖開白鳥飛邊一水迴遠聽歌聲何處發  
荒烟落日釣船來

范梈

贈廣居查尊師遠遊

查君學道戀名山，廬結東南紫翠間。  
更憶皇州春色好，却辭仙館曙光閒。  
千年城郭逐人去，八月星河奉使還。  
莫謂崑崙無覓處，早將詩賦動江關。

十月十八日至懷安縣是夕入福州城

山城列障駐餘霞，水與長空遠映沙。  
芍藥省中人望幸，荔枝林外客思家。  
遙遙徐市三神擢，渺渺張騫八月槎。

蚤歲學遊今白髮不應猶戀棗如瓜

平臺晚懷

落日微風生晚涼平臺西上萬山蒼  
佳人獨不生同世樂土乃知是異方  
海岳雲霞千古意鄉關道路九回腸  
丹青不寫歸田賦猶以虛名累霍光

送別周儀之推官赴錢塘并簡李四秘書

武帝龍飛第一春京華相送各沾巾  
詎知邂逅文身地總是棲遲皓首人  
山驛蛟眠星滿涸水鄉鴈起月迷津

若逢李洞南天竺謂是前書感謝頻

寄朱鍊師

仙人江上館帝子閣前村一去無消息三年廢討論雲  
深燒藥塢水近種花源惟有清風至時時為掃門

京下思歸

黃落薊門秋飄飄任遠遊不眠聞戍鼓多病憶歸舟疎  
雨從昏過繁星達曙流卿非徐孺子萬口薄南州

八月十五日夜

城上初聞柝天邊獨倚樓  
可憐今夜月還照異鄉秋  
燭暗頻移席簾垂不動鈎  
迴文機錦字寫得大刀頭

題黃君秋江釣月圖

舊識先生隱者流  
偶因圖畫想滄洲  
斷雲滿路碧牕晚  
明月何年青嶂秋  
世故風塵雙短屐  
生涯天地一孤舟  
何由白石空磯畔  
招得人間萬戶侯

題先天觀山水圖

學仙之人與山為徒  
往往在匡廬之奧  
湖江之區  
張公

鍊丹作龍虎丹成御氣遊六虛後來作者絕代無復有  
逸人任元都元都之壇角井孤上摩萬里之黃鵠下伏  
千尺之飢飈陰森檜筠自大古斬種力與開闢俱扶桑  
朝日挂絕壁坐見樓觀青模糊擘厓控絃瀉哀壑秋雲  
春露芝田腴我亦人間山澤臞偶隨夔龍賓唐虞有時  
一醉黃公壚震風三日撼不蘇折花不得度弱水揮手  
始識仙凡殊玉堂學士危與吳遺我茲山之畫圖尋山  
數戶久歎息無緣置我雙檇蒲獨行幽人不受呼掃葉



青澗聽啼鳥日莫羅徑相縈紆相縈紆向何處明朝為  
借麻姑鵬我亦騎之上天去

王氏能遠樓

遊莫羨天池鵬歸莫問遠東鶴人生萬事須自為跬步  
江山即寥廓請君得酒勿少留為我痛酌能遠之高樓  
醉捧勾吳匣中劍斫斷千秋萬古愁滄溟朝旭射燕甸  
桑枝正搭虛窗面崑崙池上碧桃花舞盡東風千萬片  
千萬片落誰家願傾海水溢流霞寄謝尊前望鄉客底

須惆悵惜天涯

日晏

昨日相期早出邨  
今朝日晏未開門  
可人一夜東風雨  
綠遍天街舊草痕

院中夜直

此身只似到南州  
莎草寒雞一片秋  
後夜玉堂誰上直  
料應少睡更多愁

離揚州

孤蓬如磨遠汀沙葉滿平湖藕未花回首竹西亭漸遠  
一江煙雨酒旗斜

過三合驛

一春歸計又蹉跎窮粵風光奈病何總有青山千萬疊  
行人長少鷓鴣多

江上古祠

老樹昂藏倚岸隈祠靈經歲鎖蒼苔豚蹄卮酒能多少  
但有羣鴉旦暮來

湖面

湖面春深煖氣勻青蕪未隕一作損已知春沙灣散駐張魚

客葦室時驚射鴈人

北山谷中老父

無多林屋冠青山長子成孫鬢未斑問我鄉原何處是  
半生江海未知還

渡端州峽

權郎得便泝清流忽報舟前曉霧收蠻語酬人翻自苦

好山不敢問何州

正月二十四日至寶圭驛是北流縣自此遵陸指

鬱林矣

遠辭京闕碧雲端  
泝盡夷江未到官  
回鴈峰南更千里  
是行誰為報平安

水樂洞

石林求路轉聳牙  
來訪香嚴大士家  
雨過門前生薤葉  
風行隴上落松花  
懸厓滴水鳴金磬  
激澗流泉走玉沙

欲適山林去城市久知寂寞勝紛華

老君臺玩月

老君臺上涼如水卧看冰輪轉二更大地山河微有影  
九天風露寂無聲龍蛇並起承金榜鸞鳳雙飛載玉笙  
不信弱流三萬里此身今夕到蓬瀛

錢塘懷古

西湖清濁自天開鴻雁鳧鷖日往來黃道星辰懷太乙  
紫微宮殿擁蓬萊能文競奏王褒頌獻壽深傾阿母盃

九域輿圖今混一百年耆舊獨興衰

化城宮闕被層阿棟宇高低若湧波翠石文章題日月  
寶珠光焰燭山河空桑說法黃龍聽貝葉翻經白馬馱  
誰道一無起衆有祇今塵土重來過

虞集

月出古城東

月出古城東海氣浮空濛車騎各已息宮闕何穹窿牧  
馬草上露吹笳沙際風帳中忽聞鴈傳令穀雕弓

賦水木清華亭

中流泛蘭柁望彼嘉樹林落日蕩野水浮雲生夕陰游  
魚戀芳藻好鳥鳴幽岑為樂空易老吾將脫朝簪

退直同柯敬仲博士賦

月下白玉階露生黃金井踈條栖鵲寒蕙流螢冷戀  
闕感時康懷歸覺宵永晨鐘禁中來白髮聊自整

于仲元舍賦紅梅

白雪不成夜丹霞遂崇朝妙質承日映飛英向風飄醉



來紅袖近歌罷綵雲消揚州問何遜何似董嬌嬈

寄題新冶亭

窈窕冶亭莫蕭條江南秋泛覽山河外張樂鳳凰丘公  
子飛翠蓋美人回綵舟從茲至黃髮樂哉以忘憂

日出行

日出上城府日莫當蚤歸城門已擊柝出郭何馬依下  
馬投館人空垣月當扉涼風振庭樹巢鳥屢驚飛起坐  
搔白髮忽如霜草柿周公不復夢仲尼故沾衣老萊有

孺色傳聞惟食薇求之事已晚徘徊行道微

贈鐵菴道者

昔遊雲臺觀山色上衣青松花春雨落栢葉秋霜零  
飢來煮白石睡起看黃庭人間忽已老莫問少微星

寄陳衆仲助教上都作

學省足清晝詞垣驚早秋美人隔河漢落月在高樓  
持衣未成曲吹笛不勝愁還趨鴟鵂觀別製鸛鶴裘

吹笛圖

白雲悠悠去長松被高丘匡坐吹笛人似是馬都郵飛  
鴻遺哀響幽泉發春流女樂亦何有逍遙以忘憂

題高彥敬尚書趙子昂承旨共畫一軸為戶部楊

侍郎作

不見湖州三百年高公尚書生古燕西湖醉歸寫古木  
吳興為補幽篁妍國朝名筆誰第一尚書醉後妙無敵  
老蛟欲起風雨來星隨天河化為石趙公自是真天人  
獨與尚書情最親高懷古誼兩相得慘淡酬酢皆天真

侍郎得此自京國使我觀之三歎息今人何必非古人  
淪落文章付陳迹

題楊友直檢校所藏李營丘枯木圖

老龍出海蒼髯鬚營丘古木天下無回枝屈鐵墮崖雲  
澗底應拾青珊瑚明堂清廟要梁棟朔風吹沙澤腹凍  
老身不用嘆遲莫按圖來求萬鈞重

送袁伯長扈從上京

日色蒼涼映赭袍時巡母乃聖躬勞天連閣道晨留輦

星散周廬夜屬橐白馬錦鵲來窈窕紫駝銀甕出葡萄  
從官車騎多如雨祇有揚雄賦最高

題江南秋思圖

三年別却釣魚磯晝看新圖夜夢歸石壁蒼松含爽氣  
江沙翠竹弄晴暉西瞻雪嶺家何在東入天台路轉微  
賀監若蒙湖曲賜遍翔千仞振塵衣

題南野亭

門外烟塵接帝局坐中春色自幽亭雲橫北極知天近

日轉東華覺地靈前澗魚遊留客釣上林鶯轉把杯聽  
莫嗟韋曲花無賴留擅終南雨後青

贈趙生

天門一日觀黃榜茅屋三年掩素扉  
紉帙蠹魚春雨潤  
練囊螢火夜光微  
夢遊朔雪留鴻跡  
思入南山望鶴飛  
會倚宮牆看射策  
上林初日炫朝衣

訪李真人不遇

退朝花底佩珊珊去訪真人曉出關  
芳草欲迷行徑古

長松深護步廊閒  
蒼龍挾雨得瑤簡  
白鹿穿雲致玉環  
如到天壇看月影  
定知清露滿人間

賦壺洲

傳聞海上有玄洲  
曾是安期舊所遊  
千頃白雲都種玉  
一杯弱水不勝舟  
魚龍夜護黃金鼎  
鸞鵠晨朝紫綺裘  
波浪不驚星斗近  
步虛聲裏度清秋

次韻朱本初訪李漑之學士不遇

城南城北暖塵飛  
伐木相求苦未歸  
吟到碧桃還細雨

行尋芳草又斜暉綺牕綵筆題詩徧斗帳沉香入袖微  
共載小車勝上馬重遊莫待曉紅稀

寄趙子敬平章

聞道乘閒入翠微猶愁嵐氣濕人衣道傍野樹飛花盡  
溪上春雲作雨歸故舊釣絲輕在手仙人棋局靜忘機  
赤松曾許同千載擬向高秋傍鶴飛

寄句曲外史張伯雨

獨抱長鏡管白雲琴心誰錄內篇文清齋三日秋仍瘦



徧禮羣真夜每分  
石記恐妨塵外事  
山經聊許世人聞  
已從司馬求真籙  
更為道章九老君

送劉宗師歸茅山

長松落落千峰雪  
碧漢寥寥一鶴風  
十月暫離句曲洞  
早春還謁大明宮  
君王舊識蒼龍劍  
圖畫新傳白髮翁  
欲把紫芝歌隱德  
三茅應聽月明中

次韻楊友直

真館能容客避囂  
深簾飛絮畫寥寥  
數枝芍藥誰相贈

一東生芻故可招坐定驚雷經席上酒闌纖月在林標  
何由長共陶弘景聽取松風作鳳韶

寄海南故將軍

海上風來五月秋晚涼聽上木蘭舟金盤丹荔生南國  
玉椀清冰出北州狂客醉時花作陣美人歌罷月如鉤  
期門舊識將軍面從獵還被翠羽裘

次韻宋誠甫學士城南訪病莫歸

騎馬城南覓舊題飄蕭席帽碧雲低東風花柳過韋曲

落日兒童唱大堤  
繡閣豈無和玉髓  
錦囊還有鑄金蹄  
歸來吟轉樓頭月  
池冷芙蓉翡翠栖

聽雨

屏風圍坐鬢毵毵  
絳蠟搖光照暮酣  
京國多年情盡改  
忽聽春雨憶江南

題陳衆仲助教送人之官南平序後

我憶錦溪最上原  
春雲為雨日行天  
何時獨上溪邊閣  
不待冷風已洒然

酬書巢送棕帚

積雨蒼苔路不分  
松華盡日落紛紛  
塵埃滿袖歸來晚  
誰與柴門掃白雲

送戴真人歸越

戴先生日飲五斗醉  
不得再飲一石不肯眠  
昨從桃源來  
兩袖携風烟  
長安道上小兒女  
拍手攔道呼神仙  
馬如遊龍花如雨  
蹴踏春秋作朝暮  
東方不作窗間戲  
上帝還令海邊去  
海邊玉虹夜不收  
貝宮珠闕皆蛟蚪  
芝

田玉樹久相待天上老仙那肯留戴先生鑑湖之水三  
千丈不可以鑑可以釀明朝亦脫錦袍去與爾酣歌釣  
船上

九日寄興

黃菊香殘夜雨烏紗醉客秋風回首十年舊事亂雲流  
水西東

青山白雲圖

獨向山中訪隱君行窮千澗水沄沄仙家更在空青外

只許人間禮白雲

題子昂蘭石

汀草離離石老蒼  
行吟何處樂清狂  
江中遺佩相思久  
莫待明年春蕨長

題王母圖

瑤草春深晝日閒  
靈芝清露自怡顏  
雙成吹徹參差玉  
八駿人間去不還

八月八日有感題視草堂壁

載筆趨芸閣探囊索縑袍坐消秋日盡心折夜風高識  
字頭先白謀生計轉勞文園多病渴常想賜葡萄

雲岩樓觀

高閣丹青起中天紫翠分窗當太白雪門俯九疑雲伐  
木山人去吹簫帝子聞塵中歸未得春思轉紛紛

子昂墨竹

吳興畫竹不欲工腕指所至生秋風古來篆籀法已絕  
止有木葉雕螭蟲黃金錯刀交屈鐵太陰作雨山石裂

蛟龍起陸真宰愁雲暗蒼梧泣湘血吳興之竹乃非竹  
吳興昔年面如玉波濤浩蕩江海空落月年年照秋屋

題柯博士畫

磯頭風急潮水長蒹葭蒼蒼繫魚榜青山一髮是江南  
白頭不歸神獨往幽篁繞屋茅覆簷木葉脫落秋滿簾  
買魚沽酒待明月應是黃州蘇子瞻子瞻文章世希有  
謫向江波動星斗夜投斷岸發清嘯栖鷗驚飛怒蛟吼  
圖中風景偶相似欣然揮灑春雲開子瞻應是念鄉里



化作江東孤鶴來

費無隱丹室

碧雲雙引樹重重  
除却丹經戶牖空  
一徑綠陰三月雨  
數聲啼鳥百花風  
年深不記栽桃客  
夜靜長留賣藥翁  
幾度到來渾不語  
獨依秋色數歸鴻

挽文山丞相

徒把金戈挽落暉  
南冠無奈北風吹  
子房本為韓仇出  
諸葛寧知漢祚移  
雲暗鼎湖龍去遠  
月明華表鶴歸遲

不須更上新亭望大不如前洒淚時

贈道士

神室誰開自洞微紫烟為戶玉為扉  
春容淡薄胎仙舞  
夜景虛明脉望飛繞指風雷龍睡醒  
滿囊雲錦虎馱歸  
猶嫌長物煩聞見更上高臺一振衣

玉華山

何處清江擁玉華手提名榜寄仙家  
光凝石殿千年雪  
影動銀河八月槎藏藥寶函騰玉氣  
說詩瑤席散天葩

奎章閣吏無能賦得似新宮蔡少霞

送人歸揚州

揚子江頭水拍天  
人家種柳住江邊  
吳娃蕩槳潮生浦  
楚客吹簫月滿船  
錦纜憶曾遊此地  
瓊花聞不似當年  
竹西池館多紅藥  
日日題詩舞袖前

過池陽與周南翁同知

使過池陽聞上日  
好懷浩蕩為君開  
江干維楫車馬集  
亭上持杯風雨來  
通夜魚龍聽語竟  
明年鷓鴣憶朝回

九華秋色翠可食為問謫仙安在哉

遊仙遊山

遊仙亭子北門東雲樹烟霞野逕通  
秋淨華峰千仞表春濃仙縣百花中  
昔人黃鶴何年去九日清樽此意同  
醉挿菊枝歸路晚莫令狂客惱衰翁

題秋山圖

峰迥留深隱天清襲素袍  
棲身斷人蹟游目送鴻毛  
樹挂栖厓鷲藤懸飲子猿  
龍眠石澗冷虎撼樹根牢  
木客

吟時共山樵奕處遭浮雲過水盡木葉挾霜高羽使來  
三島胎仙舞九皋左招玉斧飲右攬赤松遨空色收寥  
廓虛聲起絳騷彈琴遺古散載酒掉輕舸遂向圖中見  
誰能世外逃乘槎幾月至一泛九秋濤

宣和墨竹寒雀

洒墨寫琅玕深宮春晝閒蕭條數枝雪不似紆千山

揭傒斯

憶昨

金史四庫全書  
卷二  
宮草葱茸禁樹齊日趨延顥對凝暉朝迎步輦花間立  
莫送回鸞柳下歸碧殿東臨瓊島近金河背引玉泉肥  
幾回宏慶門前路春雨濛濛欲濕衣

夢武昌

黃鶴樓前鸚鵡洲夢中渾似昔時遊蒼山斜入三湘路  
落日平鋪七澤流鼓角沉雄遙動地帆檣高下亂維舟  
故人雖在多分散獨向南池看白鷗

送道士薛元卿歸江東

知君此去漸難招，只在人間已廓寥。  
市上有時逢賣藥，山中何處覓吹簫。  
仙岩花落溪流滿，鬼谷雲開樹影遙。  
未必故山安隱逸，海天涼月夜蕭蕭。

送詹宗師還廬山

香爐峰色紫生烟，一入京華路杳然。  
雲碓秋閒春藥水，雨犁春卧種芝田。  
書憑海鶴來時寄，劍自潭蛟去後懸。  
忽報歸期驚倦客，獨淹微祿負中年。

送王留守宣慰荆湖

舟楫連檣出薊丘  
弓刀千騎入荊州  
歌翻郢雪寒暄變  
思逐岷江日夜流  
雲雨暝連神女宅  
山川晴繞仲宣樓  
豈無賢士堪招隱  
應向鹿門深處求

贈王郎

王郎楚狂士  
意氣飛秋霜  
讀書破萬卷  
下筆數千行  
富貴視浮雲  
况肯矜文章  
十五耻閭里  
掉臂辭故鄉  
夜宿東海月  
朝買西州航  
瞋目王公前  
結客少年場  
一飲或一石  
一醉或十觴  
寧揖屠狗人  
不與俗士當  
千金不易



笑歲暮單衣裳阮籍在窮途英聲連四方鸞鵠有時鍛  
反愧燕雀翔世無劇孟交不及青樓倡燕趙如花人翠  
袂黃金璫不識豪俊士空媚癡與狂王郎遠過我坐我  
枯藜床終夕無酒飲撫髀歌慨慷平明別我去極目空  
茫茫

高郵城

高郵城城何長城上種麥城下種桑昔日鐵不如今為  
耕種場但願千萬年盡四海外為封疆桑陰陰麥茫茫

終古不用城與隍

飲張氏別墅

楚國多才俊張家好弟兄出門湖水碧留客野堂清  
微雨鳴疎竹寒烟覆古城園人隔畦語歲暮此中行

山莊晚有懷舍姪督穫臨川

藪藪黃桑葉蒼蒼白竹峰居門爭野碓歸客背村鐘  
路暗緣溪濕山寒著霧濃阿咸收稻未辛苦缺相從

寄劉師魯

想君遊宦處正直洞庭湖落日波濤壯晴天島嶼孤舟  
航通漢沔風物覽衡巫天下文章弊非君孰起予

贈胡汲古

野客何蕭散長年暫出遊風塵惟短褐江海自扁舟有  
跡能來往無心任去留才名今藉甚屈指到枚鄒

送徐義父入京

幽燕向日邊裘馬去翩翩磧迴沙如雪河窮浪入天上  
書雙闕下待詔五門前壯節當奇遇無煩愧往賢

題花鳥圖

吳中女兒顏色好洗面看花花為俏調朱弄粉不自施  
寫作窗間雪衣鳥綠窗沈沈春晝遲半生心事花鳥知  
花殘鳥去人不歸細雨梅酸愁畫眉

秦淮

秦淮江上送飛鴻秦淮水流西復東六朝人物已寂寞  
萬古雲山空疊重明日還沽采石酒昨朝猶聽廣陵鐘  
人生不似寒潮水去去來來有定蹤

滕賓

感遇

吾愛李太白玩世如遊龍  
自知天上謫何必人間容  
海風吹綠髮蕭蕭卧雲松  
我昔夢見之遺以金芙蓉  
清輝恍在眼月落蛾眉峰

吟人

吟人瘦倚玉闌干  
酒醒香消午夢殘  
燕子不來春事過  
半簾疎雨杏花寒

贈弓秋蟾

瓊花十里小樓紅醉吞牛斗眠長虹十年四海分萍蓬  
一笑邂逅滕王洪床頭回首黃金空但見耿耿盤心胸  
問蟾何不歸蟾宮自有老月留身中誰受一粒金丹紅  
學得紙上畫黑龍白晝呼吸風雲從頃刻霧暗天濛濛  
妙處巧奪造化工不復知有陳所翁君不見金陵壁上  
不點瞳點瞳霹靂驚江東我欲煩君具毫楮畫一小龍  
回顧母普令天下生孝心不向江湖長驗雨

訪隱

西風短褐飛黃埃何不從我遊蓬萊  
狂歌醉舞下山去後夜月明騎鶴來

黃潛

北山紀遊

却問仙山去幾程白雲如簇近相迎  
直須不脫登山屐行盡松聲與水聲

開元宮

金匱山房詩集卷二  
誰使藏舟一夕移紅樓翠幕未全非曾聞帝子乘鸞去  
疑有仙人化鶴歸烟迴月明瑤草歇石壇露冷碧桃稀  
赤闌橋畔多時立閒看楊花作雪飛

龍潭山

二月清江照眼明避風舟楫滿迴汀斷雲挾雨時時黑  
密葉藏花樹樹青習隱未成陶令賦行歌聊共屈原醒  
碧潭光景無消息坐看遊魚點翠萍

送覺上人遊金華



憶同夜上妙高臺坐聽泉聲響怒雷久別烟霞如夢寐  
舊遊岩石長莓苔挂冠方厭人間事飛錫俄從世外來  
何處深春可遊客金華山色紫崔嵬

憶友人

無復高談慰索居壯心零落竟何如人間漫有金臺夢  
身後誰傳玉枕書半畝蒼苔埋壁地一聲白雪斷絃初  
芙蓉峰下聞吹笛淚滴春天草木疎

題雪竇妙高臺

偶為清遊宿梵宮  
凌晨試上最高峰  
水翻雪色寒猶落  
雲掩丹光遠更重  
舊有一僧能跨虎  
近聞三洞盡藏龍  
下方車馬應難到  
烟際唯聽日暮鐘

送張秀才歸里

青陽河畔杜鵑啼  
歸路如弦定不迷  
應到故山叢桂裏  
笑人騎馬聽朝雞

北山紀遊

坐愛春泉響翠微  
玉花吹濕薜蘿衣  
何由著我冰壺洞

卧看青天白練飛

題丁文苑同年哀詞後

自別瓊林雨露邊  
江湖目斷綉衣前  
禹門尚想龍初化  
遠海驚聞鶴已仙  
烈日秋霜空耿耿  
重山宿草正芊芊  
不才死後知何用  
坐對諸郎獨泫然

劉蕢祠堂

劉君古遺直  
祠堂在丘園  
嗟此豪俠窟  
文雄條狐騫  
平生二三策  
匪邀明主恩  
瑣瑣談得失  
無乃市井言  
憑高

金分已屆全書  
卷二  
一長望若厭車馬喧微風過疎雨青山滿前軒陰晴歎  
異態浮雲實無根悠悠千載心去去無復論

傅若金

宿崇仁峽

扁舟夜宿魚龍窟久客長懷虎豹關歲暮思家成白髮  
天涯持酒看青山張騫浪喜葡萄入馬援終嫌薏苡還  
天子只今勞遣使將軍何日遂平蠻

駕發

天門曉啟黃金鎖，路馬遙翻碧玉蹄。  
銀燭熒熒花外出，翠蕤冉冉柳邊迷。  
千官劍佩屯雲合，五衛旌旗擁日齊。  
後夜龍沙駐清蹕，侍臣不寢聽晨雞。

仇工部古松歌

蒼松在山自奇古，灌木翳之人不驚。  
忽然圖向堂上壁，滿座歎息長風生。  
交柯崛走森晝晦，其下將疑鬼神會。  
霧雨寒霏虎豹毛，雷霆怒坼蛟龍背。  
乃知巨筆老且神，力斡造化雄千鈞。  
皇天不天棟梁具，后土潛回霜雪春。

爾松已為人愛惜見爾為爾生顏色山中豈無材木倚  
絕壁未逢匠石嗟何益

常寧劉百戶園林

少壯從戎事歸休遂野情鶻冠時自著龍劍夜猶鳴竹  
下思羊仲瓜前感邵平知君縱幽賞心已薄浮名

和危山臞寄弟

故園兄弟總相思久客懷歸屢失期司馬却慚題柱早  
東方翻恨上書遲都門柳暗愁中見鄉國花繁別後知

昨日南橋放春水望雲回首獨多時

題書船入蜀圖送蔓州教黃尚質

楚客之官泛蜀船畫圖盈尺見山川九江樹色瀟湘外  
三峽猿聲灩澦前方譯漸通巴俗語國書新絕漢人傳  
豈無好事能携酒問字時時集講筵

王氏師山庄

相師之山雲杳冥千巘萬壑倚空青上方雷雨藏天井  
南極風烟落洞庭溪客去迷花藹藹野人居愛竹泠泠

何時遂買登山屐乘興還來叩石扃

龍翔寺

梵王宮殿倚青冥先帝旌旛擁百靈寶網自鳴空裏樂  
琅函時出賜來經近山鳳去花仍碧遙海龍歸樹獨青  
玉輦宸遊竟寥廓行人揮淚讀新銘

秋興

天上旌旗捲暮寒人間鼓角送悲酸瑤池落日迴青鳥  
月殿浮雲掩素鸞揚柳漸稀風瑟瑟芙蓉已老露溥溥



砧聲苦近南隣客寥落羈懷強自寬

甘立

吳王納涼圖

六月長洲水殿涼酒酣揮袖倚新粧芙蓉露冷秋雲薄  
回首西風響屨廊

題柯博士墨竹

嶰谷春深落粉香拂雲和露倚蒼蒼月明後夜吹簫過  
應是伶倫學鳳凰

春日有懷柯博士

闔閭城外亂鶯啼  
笠澤春深水滿陂  
好買扁舟載圖畫  
布帆東下若耶溪

聞說新來白髮稠  
茂陵多病不勝愁  
吟成定似張公子  
癡絕真成顧虎頭

賈治安騎驢圖

西風烏帽鬢毵毵  
拂袖長吟倚暮酣  
得句不衝京兆尹  
蹇驢行遍大江南

古長信秋詞


缺月流光入綺疏  
金壺傳箭夢迴初  
秦臺彩鳳無消息  
桂影空閒十二除

輦路青苔雨後深  
銅魚雙鑰晝沉沉  
詞臣還有相如在  
不得當時買賦金

昆明池歌樂

彩鷁齊飛簇畫旗  
甲光如水入雲低  
長楊五柞遙相望  
笳鼓歸來日每西

博望封侯萬里還  
血流赤海骨如山  
將軍新賜樓船印  
錦纜牙樯杳靄間



元藝圃集卷二

欽定四庫全書

集部  
元藝圃集卷三

詳校官中書臣陸湘

侍讀臣孫球覆勘

總校官檢討臣何思鈞

校對官編修臣盧燧

謄錄監生臣李世麟

欽定四庫全書

元藝圃集卷三

明 李蓂 編

倪瓚

送張伯雨遊張公洞

荆溪山水閔靈宮子晉鸞笙下碧峯  
午夜月明風滿嶂  
千巖人靜鶴眠松  
綠知瑤草春來長  
應有仙人洞口逢  
莫為青騾翁  
久住歸來騎取葛陂龍

送李徵士過荆溪訪王司丞

何處尋狂客故人王子猷  
花落庭前樹風吹溪上舟  
紫筍生春雨綠蘋滿芳洲  
心隨酒船發悵望不能休

寄忻笑隱

江南隱者人不識一日聲名動九重  
地濕厭聞天竺雨月明來聽景陽鐘  
衲衣香暖留春麝石鉢雲寒卧夜龍  
何日相從陪杖屨秋風江上採芙蓉

次韻送柳先生貫東歸

賦詩南澗寫烏絲  
靄靄停雲去後思  
鄉國動成經歲別  
江湖復與故人辭  
溪船斫鱸雲生柁  
松室聞猿月滿枝  
他日重尋吾子宅  
詠訶猶及暮春時

春日雲林齋居

臨池春流駛掃地  
夕陰滿正襟  
味道言超遙  
坐溪館嵐嶺  
當書榻煩襟  
一舒散靡靡  
松花黃  
逐逐雲氣暖  
石梁青苔合於焉  
人跡斷故非  
與世疎  
冥栖遂忘返

王永年



題墨竹

泛泛湘水春依渭川曲勝地不再逢於焉見叢綠碧  
幹冒餘烟晴梢媚涼旭恍然碧雲中可玩不可掬人間  
白日靜風定層漪淥此君信佳人悟悅何由足

楊果

洛陽懷古

洛陽雲樹鬱崔嵬落日雲深首重回山勢忽從平地起  
河聲偏到故宮哀五噫擬逐梁鴻去六印休驚季子來

惆悵青槐舊時路年年無數野棠開

李京

留別成都諸公

蒼龍雙闕鬱岩堯曾侍鵷鷺趨早朝往事已隨塵滾滾  
虛名贏得髮蕭蕭長林豐草空相憶瘴雨蠻煙若見招  
借問都門門外柳為誰留著最長條

李源道

燕中懷古

荆卿墓上草離離郭隗臺邊對落暉戰國山川秋氣壯  
中原豪傑晚星稀乾坤納納無人識南北年年有雁飛  
說似蘆溝橋畔柳安排青眼送將歸

馬易之

宿赤城館

休駕赤城館憑軒望前山飛雨西北來亂洒石壁間風  
寒樹淒淒木落沙班班牛羊盡歸村微燈掩松闌野老  
頗留客及此農事閒傾筐出山果濁酒聊慰顏移尊對

金閣靈宮鬱孱顏安得吹簫人乘鸞月中還

劉汶

贈劉禹玉

劉郎方朔徒遊戲紫泥海千年華表非惟有寸心在向  
來浙水西雄辨吞虹蛻手携九節杖東入蓬萊棲我時  
探禹穴同看山陰雪千人萬人中怪子獨超越朝騎白  
鼻騮暮逐油壁車得錢即付酒携妓顏如花踏翻豪俠  
窟醉狎山人家或嘲狂處士或誚報恩子從渠立名多

詐識子奇偉一朝去鄉國北上爭吹噓家無十金產袖  
有萬言書所陳果何事為國非自計寧遭丞相嗔肯負  
丈夫志蹉跎十數秋甘與黃冠儔善藏倚天劍未暇摩  
斗牛幡然走山東隱跡隨壺公還尋岱宗去絕壑凌天  
風雞鳴上日觀眼亂扶桑紅窺臨事未已逸氣橫萬里  
行歌齊魯間興為廬山起廬山秀可滄怡此冰雪顏揮  
毫洒瀑布五老開雲闕遠公拍手笑喜見遺民還乃知  
士不偶正可遊名山去年卧衡岳聊憇四海脚狀垂君

平簾懶賣伯休藥却呼魏夫人共把流霞酌今年與山  
辭下走湘水湄臨風弔賈傅酹月招湘纍文章本踈蕩  
強忍終技癢光怪不可收倏忽又千丈有時遇知音朗  
咏山中吟復恐兒輩覺不得容山林茲辰忽聚首慰我  
別來久辛勤四十霜所獲竟何有却懷居東時勇以功  
名期焉知尚漂泊筋力供路岐舉杯置往念此去安所  
之南窺古雲陽更了山川竒山川固娛目慎勿過幽獨  
奈何白雲歌再送劉十六乾坤眇蒼茫回首眷空谷我

將秣其駒乃不受羈束願子無遐心歸哉返初服

彭炳

明簪

明簪倚脩筠撫擎自清絕明河夜無聲茅亭四檐月露  
寒鶴夢醒山花落香雪白雲雖無心今宵倘怡悅持杯  
欲問之忘言楚天碧渺然思美人芙蓉似顏色乘鸞月  
明中青霞擁鸞翼冉冉別離時吹簫苦幽咽

楚山

楚山琢青玉斗酒浮漢江叩舷歌明月慷慨過楚邦亡  
國非所邳鹿門思老龐此心出萬物富貴焉可降卧龍  
拜床下高風古無雙

懷彥肅

二年不見瓊花樹脩竹長松獨倚樓一片白雲東海上  
又隨春雨過揚州

絕句

坦坦黃金道蛾眉坐瑤車莫隨雙燕子容易落人家



李冶

瀟湘夜雨

遠寺孤舟墮渺茫  
雨聲一夜滿瀟湘  
黃陵渡口風波暗  
多少征人說故鄉

李昶

寄王總管

華陽東下古梁州  
五馬旌旗擁上游  
腸斷寒江衣帶水  
令人空望鎮南樓

過故縣埧

憲宗皇帝射臺高氣壓蠻江萬丈濤玉輦不歸岩樹冷  
白雲何處醉蟠桃

張惟中

月梅

南屏山下一枝開西子湖頭幾度來惆悵無人重放鶴  
酒船空棹月明回

丁守忠

贈玄莫鍊師

神仙中人毛外史方瞳深碧虬髯紫了知大道本無為  
況是谷神元不死偶因救旱驅玄溟倒瀉銀漢如建瓴  
功成不居拂衣去洞庭渺渺君山青

張昱

壽光宮訪道士不遇留題

高阜臨大溪激流喧衆石中藏壽光宮年深翳金碧儼  
然天人尊羽衛何赫奕回廊蔭古木苔蘚少行跡傳昔

丹霞士於斯鍊金液徘徊長松下瞻望雲氣白不見種  
桃人惆悵理還策

周馳

懷郭安道

江南江北路茫茫明月高樓各異鄉旅雁叫雲天似水  
故人今夜泊瀟湘

和郭安道韻

西風吹起白頭波半夜扁舟掠岸過不向長橋酤一醉

滿天明月奈秋何

雜興

涼氣潛侵玉女窗  
井梧一葉下銀床  
離情有似東流水  
一夜相思歸夢長

楊柳青青麥吐芽  
壺觴來就野人家  
可憐廢井荒畦畔  
狼藉東風一逕花

巴延子中

春日

幾片殘紅點客衣  
小溪流水鰕魚肥  
畫橋盡日無人過  
楊柳青青燕子飛

姚燧

輿病高崖道中作

役役乾坤遠  
栖栖道路頻  
五年三入蜀  
十夢九歸秦  
瘡鬼偏凌客  
山英定笑人  
無勞問前渡  
祇覺白頭新

舟達黃溪

草木隨寒暑  
殊方榮悴同  
葦華兼露白  
檉葉未霜紅  
日

月雙飛鳥江湖一病翁晚來沙嶼上愁坐獨書空

李繼本

寄思温尹

長松過雨碧蕭森涼籟吹香滿素襟泉落空潭秋洒洒  
雲生虛室晝陰陰塵埃書劍千山路風雨江湖萬里心  
客散衡門更清絕月明誰聽紫瓊琴

陳孚

鄂渚晚眺

黃鶴樓前木葉黃  
白雲飛盡岸茫茫  
櫓聲搖月歸巫峽  
燈影隨潮過漢陽  
庾令有塵汙簡冊  
禰衡無土蓋文章  
闌干只有當年柳  
留與行人記武昌

交趾使還

少年偶此請長纓  
命落南州一羽輕  
萬里上林無雁到  
三更函谷有雞鳴  
金戈影裏丹心苦  
銅鼓聲中白髮生  
已喜歸來身健在  
夢回猶覺瘴魂驚

燕山除夕簡唐張二文友



萬井笙歌徹曉聞  
千官待漏夜紛紛  
奴星有柳祠窮鬼  
臣朔無柑遺細君  
長樂鐘聲敲碧漢  
廣寒簾影捲紅雲  
自知報國無他技  
賴有詩書可策勲

出門別親友

停君漢水浮鴨之翠杓  
聽我嶧山栖鷺之綠桐  
男兒拂衣出門去  
龍泉三尺光如虹  
君不見磻溪鶴髮釣魚者  
偶擲漁竿來牧野  
白旄麾開炮烙烟  
桓圭朱芾侯青社  
又不見南陽卧龍人不識  
一朝佐漢坐狼石  
羽扇輕搖

蛇鳥驚火精焰焰天西極旗亭四月柳如藍紫騶嘶風  
黃金駮豈無叩牛歌亦有捫虱談天生巉岩萃律骨蒿  
萊槁死誰能甘我欲登泰山扶筇歎天關東溟弱水如  
可攀手弄白日青雲間我欲渡黃河赤脚凌秋波水仙  
樓閣高嵯峨徑叱海若笞蛟鼉

銅雀臺

古臺百尺生野蒿昔誰築此當涂高上有三千金步搖  
滿陵松柏圍鳳綃西飛燕子東伯勞塵間泉下路迢迢

龍帳銀箏紫檀槽怨入漳河翻夜濤人生過眼草上露  
白骨何由見歌舞獨不念漢家長陵一杯土玉匣珠襦  
鎖秋雨

吳宮子夜歌

紫貝樓闕鬱金香暖雲七十紅鴛鴦玉蟾笑擁霞綃裳  
星河不墮宮漏長綠樽灑灑灑麟髓泣露重花寒秋不濕  
歎歌一聲起雪濤海龍夾陛如人立誰知淺顰蛾半掃  
中有踈螢滿秋沼越兵曉踏西風來碧波一夜芙蓉老

太液秋風

一鏡拭開秋萬頃，碧天倒浸琉璃影。  
寒飈夜捲雪波去，貝闕珠宮黛光冷。  
三千歌棹搖綠烟，濕鬢吹墮黃金蟬。  
琪樹颼颼紅鯉躍，袞龍正宴瑤池仙。

瓊花春陰

一峯亭亭湧寒玉，露花不墜瑤草綠。  
珠樓千尺漢星間，天風吹下笙韶曲。  
萬年枝上榭葉滿，小鸞悵悵遶龍管。  
金根曉御翠華來，三十六宮碧雲暖。

居庸疊翠

斷崖萬仞如削鐵鳥飛不渡蒼石裂嵯岬枯木無碧柯  
六月太陰飛急雪寒沙茫茫出關道駱駝夜吼黃雲老  
征雁一聲起長空風吹草低山月小

西山晴雪

凍雀無聲庭檜響冰花洒簷大如掌平明起視岩壑間  
插天瓊瑤一千丈夕陽微漏光嵯峨倚欄更覺爽氣多  
雲間落葉有徑否想見樵叟猶青蓑

玉泉垂虹

雪波碧擁千崖高落花點點浮寒瑤日斜忽有五彩氣  
飛上太空橫作橋古寺殘鐘荅鈴語回首前村猶急雨  
輕綃欲翦一幅秋又逐西風過南浦

薊門飛雨

黑雲如鴉漲川谷雲湧電躍風折木半天萬點捲海來  
森森映地如銀竹鳳城無數笙歌樓珠簾半捲西山秋  
誰知羈客家萬里一燈正擁寒衾愁

湖上感舊

西日朱樓擁翠鈿  
女牆猶在草芊芊  
東風第六橋邊柳  
不見黃鸝見杜鵑

李溉之

我本山人素志邱壑  
獲歸名山為願畢矣爰以四  
月十一日離京師是夜抵潞陽慨然賦詩還慰匡  
廬隱者并以寄金門諸公為一喙云

野馬脫羈鞅  
倏疑天地寬  
臨風一長鳴  
風吹散入青冥

間頗如魯仲連到海不復還又如安期生長留一鳥令人看江南浩蕩忽如海落日照耀浮雲闕既不能低眉伏氣摧心顏詭遇特達驚冥頑又不能抱書挾策千萬乘調笑日月相迴盤匡廬迢迢接仙山仙翁泛若秋雲閒長松之陰引孤鶴望我不見空長歎采鉛天池飲淥桃花灣蒼梧倒影三湘寒赤城霞氣生微瀾鯨鯢翻空海波赤曉色欲上扶桑難人間之樂兮誠不足恃何如歸卧棲岩巒棲岩巒卧岩穴夜半天風吹酒醒猶有



西溪萬年月

題漢陽郎官湖

山翁薄暮醉酒歸，杖藜迷却高陽池。  
清風吹花綠陰倒，我笑謂是秋雲移。  
還乘貫月槎，夜過郎官湖。崢嶸星斗  
如江漢，蕩漾槎影如鯨魚。九華之真人，  
邀我倒玉壺。麒麟擘脯供行厨，依稀仙  
樂在空際。碧山西映寒蟾孤，舉酒酌寒  
蟾。明月下飲姮娥居，霓裳拂雲錦。萬荷  
露瀉瓊瑤珠，麾幢掩靄羅烟空。乃有玉皇  
所授之玉童，風前飄

飄曳廣帶對立十二秋芙蓉清香九曲銀河通真人綠  
髮披春風錦袍玉雪照天地口說姓字安南公是公多  
逸氣略與古昔賢豪同時能掃月色延我石室烟蘿中  
又言昔同張謂所遊地長嘯一覆丹霞鐘風吹仙樂度  
溪去我已醉卧香爐峯

沈原禮

題蘇小小墓

歌聲引迴波舞衣散秋影斷夢別青樓千秋香骨冷青銅

鏡破霓飛鸞飢鳥弔月啼鉤欄風吹碧火火不滅山妖  
哭入狐狸穴西陵墓下錢塘潮潮來潮去夕復朝墓前  
楊柳不堪折春風自綰同心結

劉致

淮南歌

甍社湖中出明月斯須千山萬山白燭龍馳影不敢眠  
淮土風烟黯無色鼉鼉起啼鰕鱖舞荷風驚濤戰南浦  
湖天無光湖水立夜半行空洒飛雨東方搖搖天欲曙

畢逋啼老扶桑樹  
淮天幽幽澹空素  
老蚌潛輝寂無處  
望夫磯

望夫山頭日欲頽  
望夫山下江聲哀  
山頭日日風雨惡  
江上不見行人迴  
空山亭亭幾朝暮  
猶記行人去時路  
知君渡河長不歸  
恨不當年逐君去  
此身化石千仞磯  
石猶可懸心不移  
長江水涸黃埃飛  
行人應有歸來時

秋雨吟

濕螢閃光飛不起  
八尺風漪夜如水  
仙姝不眠肌骨清

起馳夜涼吹玉笙曲中忽作孤鳳鳴  
天地感泣秋雨零  
早龍渴死嗟不及坐見扶桑落葉濕  
前溪水高龍夜吟  
不管西郊老農泣

李鵬

三尺水劍歌

龍侯手提三尺水清晨訪我古獄裏  
直愁雲氣感星辰  
滿目寒光素濤起玄冰凝結搖空青  
芙蓉白日生精瑩  
為君拂拭開寶匣烟若積雪涵疎星  
起看天地雲冥冥

誰其麾叱走六丁為擊風雨驅雷霆蕩滌氛祲萬國寧  
上頭銘字侯所作辭嚴義正發炳靈憐君少年負才氣  
每能仗義討不廷側身北望空馳情君不見燕丹夙夕  
得荆軻尊前擊筑揚悲歌咸陽西入萬狼虎白虹貫日  
橫秋河英雄事去一朝異奈此古來憂憤多憂憤多  
向誰語我有高懷亘千古黃金不用買功名失勢因之  
虎為鼠嗚呼腰間寶劍棄如土為爾更歌公莫舞

鬼首法刀歌

狂狴雲黑風怒號古栢下蔭青天高白頭獄卒氣如虎  
示我鬼首之法刀刀光閃閃展秋練朱髮蒼髯颯青面  
玄冥使者為護持一夕蟠空起雷電雷公霹靂電火微  
恨血漠漠青燐飛妖狐跳梁天狗吠北斗白日無晶輝  
君不見東南羣盜方馳突黃牛峽西更倉卒酒酣激烈  
風火生我欲持刀待明發青燈熒熒古獄中起來搔首  
亂飛蓬還君此刀淚沾臆嗚呼壯士今沈鬱

黃真仲

麻姑山

麻姑山前江接天  
女兒浦口好泊船  
船頭鷗鷺不相識  
飛上釣魚竿上眠

草堂張燈宴集分題賦清夜游曲

鰲山宴罷紅塵隔  
壁月猶貪醉春色  
笙歌不放彩燈閒  
更向花朝作元夕  
水晶簾底珊瑚枝  
綵虹亂掣金蛇飛  
紅渠縮水開瑤洞  
寶鴨噓雲結綉幃  
朱宮十六天魔女  
手撚天花散香雨  
玉鉤笑裏暗藏春  
翠黛愁邊偷換羽



何人截竹吹涼州玉兔飛入銀河流安得箋天乞長夜  
夜夜花開作勝遊

李孝光

寄朱希顏

江邊鴻鴈下年年容子何由兩鬢玄七十二灘秋月白  
荻花風落釣魚船

大星

大星在天小星落城頭鳴鳴吹畫角津吏擊鼓河上船

行人草草居人憐男兒墮地弧矢願南北東西君莫怨

江山圖

元氣菌蠢生蛟龍銀河倒插金芙蓉九疑正在九州外  
碧樹悄悄連丹楓上有萬古不死之明月下有掀天巨  
浪之長江有客有客陸龜蒙往來江南成老翁天地無  
家屢回首放船去踏江上峯船頭十日懸青雨風拔銀  
河映東戶山隨沒鷓落中原水作巴蛇走全楚向來英  
雄定黃土空遺絹素流今古天地一合如金甌萬歲千

秋奉明主

題太一蓮舟圖

銀河跨西海秋至天為白一片玉芙蓉洗出明月魄太  
一真人挾兩龍脫中大笑眠其中鳳麟洲西與天通扶  
桑迺在碧海東手把綠雲有兩童掣鬣二鳥開金籠

雅勒呼

留別彥香學士

十年帝里共鳴珂別後悲歡事幾多汗竹有編歸太史

雨花無迹染維摩  
湘江夜雨生青草  
淮海秋風起白波  
明日扁舟又南去  
天涯相望更如何

京師元夜

華月澄澄宿霧收  
萬家燈火見皇州  
天闔虎豹依霄漢  
人海魚龍混斗牛  
公子錦韉鳴玉勒  
內家珠箔控銀鈎  
道旁亦有揚雄宅  
寂寞芸窓冷似秋

汴梁懷古

花石岡前麋鹿過  
中原秋色動關河  
欲詢故國傷心事

金華山志卷三  
忍聽前朝皓齒歌  
蔓草有風嘶石馬  
荆榛無月泣銅駝  
人間富貴皆如夢  
不獨興亡感慨多

張翥

重賦明山歌送胥式有儀還武昌

盱母城南隱居者  
一生耕鑿盱南野  
何年移入明山來  
築樓山顛雲在下  
環山小塢三十六  
中有清池映桑竹  
日高塢口煙霧消  
稍見行人出深谷  
池頭古井穿石空  
池底暗與江流通  
井中鯉魚長尺半  
人不敢取疑蛟龍

隱居何人曾子白誰其從者胥生式先生喜與山為徒  
意不在仙在樓居胥也來讀山中書溪翁野老時時一  
相過有筐盛蕨兮有酒盛壺興酣題詩滿青壁墨痕入  
石青糝糊華蓋浮邱石門麻姑隣峯近壑可遊行中山  
之樂足以適吾軀生今掉頭不肯住京塵茫茫歲云莫  
豈知卬亦愛山人未辦山貨得歸去曾先生幾時把袂  
明山行洒掃樓上聽松聲黃精飽啖一千日飛上丹梯  
朝玉京

送鄭喧宣伯赴竒納克實山大鄂爾多儒學授教

野散千軍帳雲橫萬里川寒多雨是雪日近海為天黑  
黍甘供釀黃羊飽割鮮廣文年少容寧慮坐無羶

寄韓伯清

淫雨俄如此能傷稼穡無積陰靈日月愁色滿江湖老  
大心空壯艱難道愈孤美人秋水外不寄錦襜褕

七月六夜對月

星會黃姑夕天回白帝秋明河初左界大火漸西流晚

景逢多故寒心集百憂山林莽寥落何處覓丹丘

中秋對月時張外史有約以醉不赴

明月中天雲霧消酒醒涼思正飄飄星河不動秋空闊  
鐘鼓無聲夜寂寥露下遠山皆落木風來滄海欲生潮  
仙家玩事無緣到虛負瑤樓聽玉簫

梅雪齊為茅山楊道士賦

雲樹生香滿佩巾紫霄最上集仙真苔荒鶴跡渾無路  
花暗笙聲不見人瑤圃月寒通白曉丹臺雲暖駐長春



莫教流水山前去恐似桃花客問津

遊鳳凰山故宮至高祺臺鴻鴈池

衰草寒烟老木風南朝佳氣落秋空  
壁來山鬼遮秦使盤泣銅仙別漢宮  
壞堦尚傳祠乙鳥荒池曾見射飛鴻  
騷人自古多荆思長在登臨感慨中

送劉彥基奉宗師命訪求道德經註

北風吹散日冥冥送子南歸出廣庭  
上國幾年陪賜履名山隨處訪藏經  
藜光照夜時燃火龍氣衝寒直射星

却憶冲虛觀前路豫章雙樹更青青

上京秋日

遠山平野浩茫茫曾是當年古戰場  
飲馬水乾沙窟白射鵬塵起磧雲黃  
中郎節在仍歸漢校尉城空罷護羌  
今日車書逢混一不辭垂老看氈鄉

螢苑曲

楊花吹春一千里獸艦如雲錦帆起  
咸洛山河真帝邦君王自愛揚州死  
軍裝小隊皆美人畫龍韉汗金麒麟

香風搖蕩夜遊處二十四橋珠翠塵騎行不用燒紅燭  
萬點飛螢炫川谷金釵歌度苑中來寶帳香迷樓上宿  
醉魂貪作野花荒肯信劔戟生宮牆爛斑古苔洗秋露  
尚疑怨血凝晶光至今落日行人路鬼火狐鳴隔烟樹  
腐草無情亦有情年年為照雷塘暮

舟發淞江夜泊廟山驛

風帆東上浪冥冥鐘鼓山前近驛亭江漢秋生河漢白  
魚龍夜沒水雲青誰從三島求仙藥自信孤槎伴客星

好喚吳兒叩舷起浩歌呼酒月中聽

施鈞

武昌南樓

鸚鵡洲邊艤客舟  
憲君邀我上南樓  
胡床老子三更月  
鐵笛仙人一曲秋  
流水白雲來夏口  
西風黃鶴上磯頭  
如今只屬王孫草  
添得江南幾許愁

偶書

薄宦他鄉是楚囚  
不堪孤倚夕陽樓  
東山別後薔薇老

南國歸來惹愁風月吟身清似鶴江湖生事拙如鳩  
鏡中秋老尊鱸美欲買烟波一釣舟

王惲

登熙春閣

封丘門外故宮傍天閣空餘內苑荒瀛海夢空三島沒  
帝城烟慘五雲蒼石鯨照水鱗猶動金鳳凌雲勢欲翔  
奇貨梁園當日盡為誰留在閱興亡

哀故宮

掖庭依約粉垣丹行入荒宮重黯然華表忽驚人世換  
昆明重見劫灰寒石龍委地埋秋草湖玉臨池倚暮煙  
滿目悲風吹酒醒東華門外淚闌干

徐履方

秦女卷衣曲

莫光續朝光朝莫卷衣裳朝朝莫莫如年長長年不久  
留紅芳卷衣裳衣裳中有雙鴛鴦含情拂鴛鴦不敢熱  
中腸上方寶鏡湛秋水解后對之肝膽張當時不照邯

鄆娼

楊白華詞

楊白華飄零楚江曲江頭日暮春草齊日短心遙泪相  
續飛飛乳燕歸不歸庭樹西風換新綠

杜瑛

弔故宮

月上觚稜椒壁濕飢烏啄碎琅玕石劫火飛盡海揚塵  
廢殿荒臺土花碧洛陽書生汴梁客一夜秋風頭欲白

尊中賴有酒如泉醉倚寒窓破愁寂

李材

泊舟湘岸

長沙今在眼青草舊知名二月風檣疾三湘雪浪平藤  
深帝子廟花發定王城莫艤江南岸啼鶻處處聲

都門春日

紫陌香塵逐玉珂彤樓花暗弄雲和光風已轉瀛洲草  
細雨微生太液波月榭管絃鳴曙早水亭簾幙受風多



少年易感傷春思  
喚取青娥對酒歌

禁城秋夕

絳宮星淡海無波  
九陌猶聞動玉珂  
閭闔微雲藏夕漏  
建章明月掛秋河  
此身天地流萍遠  
故國關山落木多  
欲聽鈞天塵夢隔  
紫簫吹盡桂婆娑

元日賀裴都事朝回

海上瓊樓接五城  
人間歌吹近蓬瀛  
雲移豹尾旌旗動  
日射螭頭劔佩明  
拜舞盡隨仙仗入  
退歸遙認玉珂鳴

欣欣百草含春意得傍東君暖處生

送省郎楊耀卿使雲南

飄飄使節出金閨郭隗臺前暫解攜  
天入五溪無鴈到地經三峽有猿啼  
子雲舊里風煙在太尉家聲日月齊  
後夜客槎何處望秋河迢遞碧雲低

葉景南

山居即事

吟榻障松屏巖扉護竹亭  
臨風梳白髮對月讀黃庭  
洞

古千尋碧峰竒萬疊青彈琴坐雲石頻惹鶴來聽

陳子貞

笠澤漁隱

方塘如鑑石如峯落葉平蕪覆一重雲作晚陰低薜荔  
水涵秋色亂芙蓉黃冠道士松間過白雪漁舟月下逢  
尚想天隨無俗伴應攜茶竈與從容

李準

汴梁朝元宮留宿

宋家天子朝元閣南內宮中太乙壇五夜星辰金榜動  
九天風露玉階寒朱衣魚鬣迎笙鶴絳節龍光引佩鸞  
八駿不歸遼海駕步虛空繞紫雲端

送危太樸還京

九重閭闔啓朱扉宮樹陰陰晝漏稀東觀日華浮象闕  
上方雲影動龍旂平明玉殿傳宣入薄暮金門待詔歸  
最說相如才調逸賦成三署有光輝

送鏡上人住廬山

雲滿袈裟月滿船  
匡廬何處定安禪  
屏風九疊啼猿裏  
瀑布千尋度鳥邊  
林下翻經依寶樹  
花間洗鉢踏金蓮  
虎溪若見陶居士  
不說高僧惠遠賢

登汴梁城

天上曾聞玉輦過  
金城千里帶黃河  
鳳凰一去蓬萊苑  
鴈鷺羣飛太液波  
燈火樓臺空市井  
風雲冠蓋盡丘阿  
惟餘畫角聲中調  
猶是流沙磧裏歌

學士草堂

名山自昔伏龍岡勝地今為卧鹿場無復仙人飛羽駕  
還聞學士結茅堂晴嵐蔽日雲當戶陰瀑冷風雪滿床  
已喜閒居近紫葢不妨幽夢隔奎章

沈貞

湖上

野水晴山湖上村柳花飛雪擁柴門魚吹浪沫翻萍葉  
鳥浴沙堤糝草根獨老一區揚子宅誰爭三里謝公墩  
清吟冷館無聊賴皓首空招楚客魂

龍仁夫

陳平章席上題琵琶亭

老大嫦娥負所天  
忍將離恨寄哀絃  
江心正好看秋月  
却抱琵琶過別船

薩都拉

三茅寧壽觀

楊子江頭春水漲  
三茅觀裏碧桃開  
道人不問天南北  
夜半月高騎鶴來

贈丁野鶴

不見遼東丁令威，舊遊城郭昔人非。  
鏡中人去青鸞老，華表山空白鶴歸。  
石竹泪乾斑雨在，玉簫聲斷彩雲飛。  
洞門花落無人到，獨坐蒼苔補道衣。

過嘉興

三山雲海幾千里，十幅蒲帆掛秋水。  
吳中過客莫思家，江南畫船如屋裏。  
蘆茅短短穿碧沙，船頭鯉魚吹浪花。  
吳姬盪槳入湖去，細雨小寒生綠紗。  
我歌水調無人續。



江上月涼吹紫竹春風一曲鷓鴣辭花落鶯啼滿城綠  
元統乙亥歲余除閩憲知事未行立春十日叅政  
許可用惠茶寄詩以謝

春到人間纔十日東風先過玉川家紫薇書寄斜封印  
黃閣香分上賜茶秋露有聲浮薤葉夜窓無夢到梅花  
清風兩腋歸何處直上三山看海霞

送僧歸廬山

楊子江頭木葉風上人歸興白雲重淨瓶滿貯蓬萊水

客舫遙聽精舍鐘到家自笑門前鶴洗鉢不驚潭底龍  
珎重匡廬山畔路逢人應問舊栽松

題舒真人仙山樓觀圖

瑤花琪樹間霓旌十二朱樓接五城臺上吹簫秦弄玉  
雲邊度曲許飛瓊光流漢殿青鸞舞霞擁函闕紫氣明  
方丈蓬萊俱咫尺不須東望問長生

寄句曲外史

霞佩翩翩出洞天當時彷彿見雕仙幾年海上張公子

今日山中葛稚川  
滄海塵飛丹已熟  
玉堂人去榻空懸  
林間載酒來相覓  
乞寫丹經與世傳

招隱首山分韻得生字

龍飛鳳隱知何處  
今日空餘黃鵠名  
千古江山圍故國  
五更風雨入空城  
猿啼洞府暮雲合  
花落祠堂春草生  
何日結茅向青壁  
抱琴坐石聽泉聲

遊竹林寺

野人一過竹林寺  
無數竹林生白烟  
江左玉龍埋碧草

月明黃鶴下青田樹銜宿雨藏山鷓花  
落春風老杜鵑  
何日來分雲半榻故人不用買山錢

夢登高山得詩

登高速望四山齊何處風流杜牧之  
白苧曾聽松下唱  
紫簫還向月中吹野雲雨後無行跡  
芳草春深有斷碑  
夢裏勝遊閒記得翠微高上寫烏絲

酬張伯雨寄茅山志

恨余未識茅君面喜得茅山道士書  
燈外雨聲那厭聽

金史... 卷三  
風前石髮豈堪梳碧窓雲氣寒生楮清室丹珠夜繞厨  
夢到層臺夜披卷桂林風動月踈踈

七日後一夜樂陵臺上倚梧桐樹望月有懷御史

李公藝

涼風吹動梧桐葉瀉下泠泠露華白樂陵臺上悄無人  
獨倚梧桐看秋月日高當午桐影直不覺衣沾露華濕  
此時却憶金陵人酒醒江樓聽吹笛

偕下敬之遊吳山駝峯紫陽洞

天風吹我登馳峯大山小山石玲瓏赤霞日射紫瑪瑙  
白露夜滴青芙蓉飄飄雲氣穿石室石上涼風吹紫竹  
掛冠何日賦歸來掃石篝燈洞中宿

夜泊釣臺

雙崖屹立幾千仞下有一葉之孤舟繁星亂垂光曄曄  
長藤古木風颼颼荒祠幽黑山鬼集怪石如人水邊立  
錦峯繡嶺雲氣深萬壑千岩露華滴山僧對語夜未央  
不知風露滿衣裳喚船振錫渡江去林黑無由歸上方

高寒宇宙無人語  
亂石灘聲洒飛雨  
欲從嚴子借羊裘  
坐待船頭山月吐

峨眉雲謝照磨李伯貞遺白石

仙人李太白俊逸天下聞  
芙蓉宮錦袍袖有峨眉雲  
峨眉山高劍門隔化為太古  
一片雪南州北越行相從  
赤日炎風消不得今年東海  
逢故人海波灩灩蒲萄春酒  
酣拂袖墮秋水但覺滿座光  
嶙峋夜深酒醒伴狂客玉  
井蓮開華峰白海天落月  
掛石林坐卧猶疑見顏色  
禿

兔謾吐峨眉雲何以報荅雙南金古人契義重金石此  
物歲寒冰雪心

題陳所翁墨龍

畫龍天下稱所翁禿筆光射驪珠宮長廊白日走雲氣  
大厦六月生寒風興來一飲酒一石手提玄兔槌霹靂  
漲天烟霧晴不收頭角崢嶸出牆壁全形具體得者稀  
今日海邊親見之滿堂光焰動鱗甲倒挾海水空中飛  
凌風直上九天去天下蒼生望霖雨太平天子居九重



黍稷穰穰千萬古

題壽監司所藏瘦馬圖

沙場日暮春草肥瘦馬不受黃金羈天生神駿天所愛  
豈容過事無人知郎官病坐芙蓉幙喜見馬圖天上落  
人生相遇貴相知孰謂世間無伯樂

和題吳閑閑京館玉本中醉作竹石壁上

硯屏花落丹水香步虛白日聲琅琅江南道士愛瀟洒  
新粉素壁如秋霜王郎酒後衫袖濕醉眼朦朧電光急

黑龍雲重雨脚斜白兔秋高月中泣倦遊借榻日觀東  
恍惚舊夢三湘中鷓鴣聲斷江路遠青松雨暗春濛濛  
高唐劉侯定齋野玄亭

淮陰季年韓將軍狡兔已死走狗烹沛中白髮周將軍  
碧色已滿細柳營何如高唐劉將軍太平不許矢石勳  
掉頭青海無傳箭天山掛却烏脚巾歸來買地築小亭  
漂水為鏡山為屏樵人溪叟日相過野歌村舞醉復醒  
去年偶爾劍戟鳴潼關馬過戰血腥白頭老子如不聞

牛背一笑千山青

補闕歌

錢塘三日風雨急古銅夜光飛霹靂知是神物出人間  
猶帶吳宮土花碧玉橋素練懸銀河支機女兒飛鳳梭  
蝦鬚風軟亂纖影春水日晴生潮波破窓冷硯留不得  
零落江南酒家客狂歌索酒仰面歎誤擊紅籌唾壺裂  
何人進入蓬萊宮銀屏碧幙珠簾重此身補闕亦何用  
玉龍瀉水流芙蓉

贈別鷺峯上人并引

予遷官出閩過建陽會同年邀予至其家因登  
溪閣俄聞茂林脩竹間有絃誦之聲詢世文乃  
靈山上人也頃之相會閣上矍然如鶴悠然如  
閒雲出所作詩一帙蕭然有林下風也予南出  
閩世文亦將赴官編脩鷺峯送予溪上徘徊顧  
望有不忍別意鷺峯湖南人本姓歐陽靈其釋  
名鷺峯其自號乃座主翰林侍讀歐陽之族也

建溪秋高山水清溪邊偶識衡陽僧臨水洗鉢掛溪閣  
夜訪校書天祿燈聖經佛偈通宵讀首著堆盤勝食肉  
回雁峯南難寄書武夷洞前堪煮粥西風獵獵吹水寒  
相送郎官南出關校書公子玉京出衡陽上人何日還  
手中玉杖春雨綠母乃湘君廟前竹胡不截作雙鳳簫  
吹作來儀舜庭曲古曲雅以淡天高難上聞不如且拄  
杖頭月歸卧祝融峯畔雲

題郭元二公畫壁

兩山出沒如虎頭爭竒角怪不肯休一山如龍入雲去  
一山化作長江流峻嶒相雄不相下欲向人間索高價  
塵中有客語如狂龍者可先江者亞一笑上馬歸醉眠  
麴生使我多妄言酒醒忽記夜來語先者姓郭亞者元

送友人之金陵

陳郎買舟上金陵寒江水落風浪小飛帆速掛蔣山青  
空城畫角秦淮曉白門酒美香滿城吳姬喚客客不行  
樓中子弟盡年少玉奴行酒吹鸞笙陳郎不聽黃金縷

朝走東吳暮走楚半生落魄一布袍感慨長歌弔千古  
六朝遺跡生暮烟故家荒塚迷花鈿鳳凰臺上酹李白  
何人知子囊無錢

雪霽訪馮道士不遇

道人已跨龍潭鶴童子能烹雀舌茶一夜山中滿林雪  
客來無處覓梅花

宮詞

楊柳樓心月滿床錦屏繡褥夜生香不知門外春多少

半醉移燈看海棠

秋詞

清夜宮車出建章  
紫衣小隊兩三行  
石闌干外銀燈過  
照見芙蓉葉上霜

西宮即事

九重五色金銀闕  
冠帶將軍盡羽林  
白髮儒臣方進講  
西宮午漏隔花深

贈道士陳華隱



早年濯足東海水去卧華峯頂上雲收得九秋仙掌露  
歸來酌獻武夷君

過高郵射陽湖

飄蕭樹稍風浙瀝湖上雨不見打魚人菰蒲鴈相語

西湖絕句 六首

湧金門外上湖船狂客風流憶往年十八女兒搖艇子  
隔船笑擲買花錢

少年豪飲醉忘歸不覺湖船旋旋移水面夜涼銀燭小

越娘低唱月生眉

紫騮嬌踏落花泥  
二月江城雨過時  
拂曉市河春水滿  
小船多半載吳姬

惜春曾向湖船宿  
酒渴吳姬夜破橙  
聽郎君呼小字  
轉頭含笑背銀燈

待得郎君半醉時  
笑將紈扇索題詩  
小紅簾捲春波綠  
渡水楊花落硯池

垂柳陰陰蘇小家  
滿湖飛燕趁楊花  
繁華一去風波減

今日橫堤幾樹鴉

黃清老

登岸書所見寄魏亨道

紫霞搖日花滿川  
漁翁不歸鷗在舫  
白雲悠然渡水去  
平野秋色青連天

寄劉鳳溪時有麻源之約不果往

南國家人髮欲絲  
仙壇孤負杏花期  
多情惟有東橋水  
流到瓜州月上時

留別

相尋復相別把酒意如何雲石有時合風湍無定波此  
行迷出處一笑對嵯峨長揖下山去暮烟浮女蘿

夜晏友入席有懷照磨

青山林下啼班鳩綠楊門前嘶紫騮落花成陣作春雨  
東風淡淡雲悠悠美人捲簾日在手蝴蝶飛上珊瑚鈎  
南溪不見筍成竹擬約滄波同倚樓

送王君冕歸陝西

狂風卷茅屋遙見溪上山  
人生有遇合離別何足歎  
黃鵠將西歸臨水振羽翰  
我有雙明珠置之青雲端  
朝朝復暮暮照君千里還

訪子威都事不遇

清曉抱綠綺來就夫君彈  
夫君久已出野水流花間  
石澗渡微雨秋生湖上山  
松陰坐永日心與雲俱閒  
人事有離合白鷗聊共還

送楊信夫歸臨江

自別武夷君海水落幾丈當年尊俎地顛倒疊橫嶂君  
從山中來應見桃花開秦人笑相語愧我非仙才茫茫  
八極中雲月秋徘徊苦吟不出戶孤負黃金壘劃然西  
風生拂我琴邊埃願從雙白鶴去去不復回

番易舟中聞友人消息因贈

峒堯九天門玉署青瑣闥老我烟霞心參商坐寥闊十  
年望春雲不忍鑷白髮鴻鴈遠塞來頻頻附書札江湖  
秋水淺舟楫苦不達不知南山陽梅花為誰發

贈汪玉成

千里還家獨抱琴  
象山杳在白雲林  
曉寒莫厭江東路  
人倚梅花雪意深

自勉

東風一笑可人心  
旋瀝新醅對栢斟  
山色未勻春意淺  
梅花已老白雲深  
半軒依竹閒聽雨  
千里懷人欲抱琴  
試問樵溪隔年意  
碧波東注渺難尋

送三山張國寶府掾美歸

三山星斗高貼天三山潮汐走百川張公平生飲中仙  
襟度脫落神飄然三山神人不敢友天風吹度金鰲巔  
掃清案牘待明月平鋪綠水栽紅蓮公庭無人山色落  
時有雙燕歸簾前樵溪夜雨深一尺城外明朝翠如織  
春歸草木不可遮黯淡已作離別色離別兮奈何若有  
人兮佩女蘿公不顧兮山之阿滄海渺渺浮雲多

友人擬古樂府因題絕句

五首

采苻歸來午花梢日轉廊綠陰涼似水不用洗紅粧



生愛東隣女蛾眉畫不如近來機杼廢臨得右軍書  
漫道從軍樂風霜只獨居三年遼水上不得一行書  
海上扶桑景清光日見君祇愁風雨夜西北有浮雲  
今夜中秋月含情獨上樓辰星三兩點偏照玉簾鈎

宋无

公莫舞

公莫舞公莫舞鴻門王氣歸真主何人睚眦赤龍子手  
循玉玦日相語令公莫舞公楚舞劍光射日白虹吐人

發殺機天不與撞斗帳中笑亞夫霸業明朝棄如土

烏夜啼

露花洗天天墮水燭光燒雲半空紫西施夜醉芙蓉洲  
金絲玉簧咽清秋鞞鼓鞭月行春雷洞房花霧酣不回  
宮中夜夜啼栖烏美人日日歌吳歆吳王國破歌聲絕  
鬼火青熒生碧血千年壞塚穴狐兔鳥銜紙錢掛枯樹  
髑髏無語滿眼泥曾見吳王歌舞時烏夜啼啼為誰身  
前歡樂身後悲空留琴怨傳相思烏夜啼啼別離

妾薄命

雲母屏瑯春冰鮫女織綃蟬翼輕比妾妾薄命比君君  
薄情紅綿拭鏡照膽明還疑妾貌非傾城傾城從來有  
人妬况復君心不如故故人心尚峯九疑新妾那能無  
故時補天天不高填海海不深不食蓮葍不知妾心

寄征衣

征衣須早寄遙憶葉砧寒莫訝啼痕少相思淚正乾

孫華

商人婦

妾年將及笄嫁與東家兒東家兒販江西夫婦五年三  
別離江西娼家花滿蹊不知今年歸不歸春來還為作  
春衣滿院楊花雙燕飛

楓橋夜泊

畫船夜泊寒山寺不信江風有客愁二八娥眉雙鳳吹  
滿天明月按涼州

貫雲石

君山行

北溟魚背幾千里負我大夢遊弱水蓬萊隔眼不盈攀  
碧落香銷吹不起茜褐女兒懷遠遊遠人不歸明月羞  
寶釵縮鬢翠欲流風鬟十二照暮秋女媧煉石補天手  
手拙石開露天醜瓊樓玉宇亦人間直指示君君見否  
斯須魚去夢亦還白雲與我遊君山